

Kesahihan Terombo

Dewan rujuk kepada sejarah

22/2/88

SEREMBAN, Ahad — Soal menentukan kesahihan Terombo Luak Sungai Ujong dijangka tidak menjadi faktor penghalang kepada usaha untuk memecahkan kebuntuan berhubung urusan mencari bakal penyandang pesaka Datuk Kelana Putra (Undang Luak Sungai Ujong) ke-10.

Dewan Keadilan dan Undang Negeri Sembilan dipercayai akan merujuk kepada fakta-fakta sejarah Luak Sungai Ujong sebelum kurun ke-14 untuk dijadikan garis panduan dalam pemilihan Undang baru nanti.

Sumber-sumber tertingggi adat berkata hari ini dewan tidak menganggap isu 'dua Terombo Luak Sungai Ujong' sebagai satu masalah yang akan menjejaskan usaha menamatkan krisis perlantikan Datuk Kelana Putra ke-10 yang sudah berlarutan lebih empat tahun itu.

"Untuk menyelesaikan isu dua Terombo ini, dewan akan merujuk kepada fakta-fakta sejarah yang wujud di Luak Sungai Ujong sebelum kurun ke-14. Tambahan pula dewan sudahpun menentukan tiga nama anak Waris dalam senarai terakhir calon Datuk Kelana Putra ke-10.

"Dewan kini hanya menunggu masa yang sesuai untuk mengadakan pertemuan dengan ketua-ketua adat Luak Sungai Ujong termasuk Datuk-Datuk Lembaga Tiang Balai dan Tua-Tua Waris bagi menentukan calon yang benar-benar layak menyandang pesaka itu.

"Selain itu, satu perbincangan antara ahli-ahli dewan dengan ibu-ibu soko di Darat akan juga diadakan sebelum keputusan muktamad mengenai bakal penyandang pesaka Datuk Kelana Putra ke-10 dibuat," kata sumber-sumber itu kepada Berita Harian di sini.

Bagaimanapun, sumber-sumber itu enggan mengulas lanjut mengenai 'fakta-fakta seja-

Oleh BUSTAMAM AHMAD

rah' yang akan dijadikan garis panduan dalam urusan pemilihan bakal penyandang pesaka Datuk Kelana Putra ke-10.

Soal menentukan kesahihan Terombo Luak Sungai Ujong baru-baru ini dijadikan isu oleh dua Rumpun anak-anak Waris di Darat daripada Perut Ulu, masing-masing mendakwa memiliki salinan Terombo Asal Luak itu.

Anak-anak Waris Rumpun Bayu dikatakan memiliki salinan Jural Telaga Undang, manakala anak-anak Waris Rumpun Tinggang pula mendakwa memiliki salinan Terombo Asal Luak itu.

Calon

Anak-anak Waris Rumpun Bayu kemudian menuntut supaya Jural Telaga Undang dijadikan asas pemilihan Datuk Kelana Putra ke-10 manakala anak-anak Waris Rumpun Tinggang pula mendakwa Jural itu tidak diiktiraf oleh pihak berkuasa termasuk Dewan Keadilan dan Undang Negeri serta Perlembagaan Negeri Sembilan.

Bagaimanapun, sebelum timbul isu 'dua Terombo' itu, dewan sudahpun menentukan senarai terakhir calon Datuk Kelana Putra ke-10.

Tiga calon berkenaan dipercayai adalah daripada kalangan anak-anak Waris Perut Ulu.

Jawatan Undang Luak Sungai Ujong ke-10 kosong berikutan kematian Undang kesembilan, Allahyarham Datuk Kelana Mohd Kasim Datuk Nika Haji Abdul Rashid pada 28 Oktober 1983.